

# Pelupusan hutang peneroka beri impak besar prestasi FELDA

Anwar lulus penerimaan pertama geran RM990 juta

Oleh Mohd Nasaruddin Parzi, Farah Marshita Abdul Patah dan Mahani Ishak  
bhnews@bh.com.my

**Kuala Lumpur:** FELDA semalam menjelaskan penghapusan hutang penerokanya sudah dilaksanakan pada peringkat agensi itu pada 2021 dan 2022 tanpa peruntukan geran dari Kerajaan Persekutuan.

Bagaimanapun, pelupusan hutang peneroka itu memberikan impak besar kepada aliran tunai dan prestasinya.

Katanya, sebagai langkah membantu dan menjamin kelangsungan FELDA, Perdana Menteri, Datuk Seri Anwar Ibrahim pada 26 Jun lalu menandatangani perjanjian Assignment for Financial Service Reserve Account (FSRA) bagi penerimaan pertama geran RM990 juta dari kerajaan untuk penebusan sukuk FELDA.

"Perjanjian itu memberi ruang kepada FELDA untuk menstruktur semula komitmen kewangan terhadap kadar faedah yang dikenakan serta pemansuhan 80 peratus hutang peneroka berjumlah RM8.3 bilion.

"FELDA menzahirkan penghargaan kepada kerajaan atas komitmen bagi menyempurnakan proses pemulihan FELDA demi menjamin kelangsungan sebagai satu institusi gergasi yang menaungi 112,638 keluarga peneroka di seluruh negara," katanya dalam satu kenyataan.

FELDA juga menjelaskan, Perdana Menteri ketika Sambutan Hari Peneroka FELDA pada 7 Julai lalu mengumumkan bermula tahun ini, Kerajaan Perpaduan meluluskan peruntukan RM990 juta setahun bagi membolehkan penebusan semula sukuknya bagi membiayai hapus kira hutang peneroka FELDA.

"Secara keseluruhan inisiatif ini melibatkan bantuan kewangan kepada FELDA sebanyak RM9.9 bilion bagi tempoh 10 tahun.

"Bagaimanapun, kenyataan Perdana Menteri disalah tafsir sehingga menimbulkan kekeliruan dalam kalangan rakyat dengan janji kerajaan terdahulu untuk menghapuskan hutang peneroka FELDA berjumlah RM8.3 bilion," katanya.



Pada 7 Julai lalu, Anwar mendakwa langkah melupuskan hutang peneroka tidak dibuat oleh Kerajaan Perikatan Nasional (PN) sebelum ini dan perkara itu berterusan sehingga beliau mengambil alih kerajaan.

Bekas Perdana Menteri, Tan Sri Muhyiddin Yasin bagaimanapun menafikan dakwaan Anwar dengan mendakwa pelupusan hutang peneroka sudah diselesaikan ketika pentadbirannya, dengan Ahli Parlimen Pagoh itu juga menuntut Anwar membuat permohonan maaf secara terbuka.

Kelmarin, Muhyiddin mengemukakan surat tuntutan (LOD) kepada Anwar berhubung kenyataannya pelupusan hutang peneroka FELDA dan menuntut permohonan maaf secara terbuka.

Menerusi LOD itu, Muhyiddin mendakwa Anwar yang juga Menteri Kewangan telah membuat kenyataan fitnah dengan niat mencemar, menjatuhkan dan/atau merosakkan reputasinya.

## Kemuka dokumen

LOD itu turut menuntut Anwar mengemukakan surat atau dokumen yang beliau tandatangan sebagai Menteri Kewangan pada akhir Jun 2023 bagi meluluskan pelupusan hutang peneroka FELDA bernilai RM8.3 bilion dalam tempoh 24 jam selain menarik balik semua kenyataan fitnah dan memadamkan penyiaran dari akaun Facebook serta laman web, platform ia disiarkan.

Pagi semalam, Anwar membalas LOD itu dengan mengemukakan dokumen yang ditandatangani bagi meluluskan pelupusan hutang FELDA berjumlah RM8.3 bilion, seperti dituntut Muhyiddin.

Susulan itu, Perdana Menteri juga mendesak Muhyiddin untuk memohon maaf atas fitnah yang dilemparkan.

"Saya kemukakan sebahagian dokumen perjanjian FSRA terkait Jaminan Kerajaan kepada FELDA yang saya tandatangi. Justeru, saya mendesak Tan Sri Muhyiddin untuk memohon maaf

atas fitnah yang dilemparkan kepada saya," katanya dalam kenyataan itu semalam.

Tiga helaian berkaitan FSRA itu menunjukkan ia ditandatangani pada 26 Jun oleh Anwar bagi pihak kerajaan, dengan Pengerusi FELDA ketika itu, Tan Sri Idris Jusoh dan Ketua Pengarah FELDA, Datuk Amiruddin Abdul Satar.

Pemeteraian dokumen itu disaksikan Timbalan Ketua Setiausaha Perbendaharaan (Pelaburan) Kementerian Kewangan, Datuk Anis Rizana Mohd Zainudin.

Sementara itu, Kementerian Kewangan (MOF) semalam mengesahkan penyaluran pertama RM990 juta sudah dilaksanakan Selasa lalu, bagi memastikan kelangsungan FELDA dengan mengambil kira impak kepada aliran tunai dan kedudukan kewangan FELDA berikutan penghapusan hutang peneroka FELDA. MOF juga mengesahkan dokumen FSRA ditandatangani Perdana Menteri pada 26 Jun 2023.

Isu hutang peneroka FELDA menjadi polemik sejak beberapa bulan lalu apabila Anwar mendakwa kerajaan PN tidak ambil langkah melupuskan hutang peneroka sehingga beliau mengambil alih kerajaan.

Dalam pada itu, bekas Ketua Setiausaha Sulit Muhyiddin, Datuk Dr Marzuki Mohamad dalam kenyataan mendakwa dokumen dikemukakan Anwar tidak membuktikan perjanjian pelupusan RM8.3 bilion hutang peneroka FELDA dibuat Jun lalu.

Sebaliknya, beliau berkata, dokumen dikemukakan Perdana Menteri adalah perjanjian mengenai sukuk jaminan kerajaan yang diterbitkan secara berperingkat.

"Dokumen itu bukanlah perjanjian pelupusan hutang peneroka FELDA, tetapi perjanjian mengenai sukuk berjaminan kerajaan yang diterbitkan secara berperingkat. Dokumen Perdana Menteri tidak membuktikan pelupusan hutang peneroka hanya dibuat pada Jun 2023," katanya dalam kenyataan Facebook.